



MARITTIMO - IT FR - MARITIME  
TOSCANA - LIGURIA - SARDEGNA - CORSE

Collectivité  
Territoriale de Corse



OFFICE DU  
DÉVELOPPEMENT  
AGRICOLE ET RURAL  
DE CORSE

# GUSTI DI CORSICA



**CRDP DI CORSICA**



# A PAROLLA DI U PRISIDENTI



Stu librettu, rialzatu da l'Office du Développement Agricole et Rural de Corse è u Centru Righjunali di Dicumentazioni Pidagogica di Corsica, in collaborazioni cù i prufissiunali di i filieri, pruponi una discrizzioni di l'agricoltura isulana trà i so prudutti imblimatichi è u so modu di pruduzzioni antichi.

Longu à a so Storia, a popolazioni di a Corsica s'hè inghjinata à sfruttà i risorsi di l'isula, fendo à mani soia u territoriu po sviluppenu l'attività di l'arburicoltura, di l'allevu è di a trasformazioni. Da sti pratici sò nati sapè-fà agricoli sputichi trasmissi da ghjinirazioni à ghjinirazioni.

Hè a ricchezza è a divirsità di st'agricoltura idintitaria chì l'ODARC vi voli prisintà in stu libru pidagogicu, arnesu divirtenti è struttivu chì t'hà l'ambizioni d'acuzà u vostru intaresu nant'à l'urighjini di i prudutti righjunali chì vo cunsumeti à spessu.

È parchì ùn fà nascia uni pochi di vucazioni pà unu di sti mistieri agricoli passiunenti è à tempu aparti nant'à l'avvena...

U prresidenti di l'ODARC  
Jean-Louis LUCIANI



# GUSTI DI CORSICA

Stu librettu hè statu aditatu à l'iniziativa è cù u concorsu di « l'Office du Développement Agricole et Rural de Corse » ind'u quatu di u prughjettu di cuuparazioni trasfrONTALIERU TERRAGIR (Programma europeu MARITTIMO)

Illustrazioni  
Jean-Louis Lacombe  
Calypso Deminati

Autori  
Jean-François Cubells  
Marie-Laure Marquelet  
Jean-Michel Weber

Sesta è impaghjinatura  
Calypso Deminati

Traduzione  
Ghjuvan Battistu Paoli  
Ghjuvan Micheli Weber

Cù a cullaborazioni fattiva di Carine Franchi, Caroline Franchi, Joëlle Henneman,  
Jennifer Méjean, Françoise Piazzoli è Marc Poggi

Ringrazii particolari à u parsunali di l'ODARC chì hà parmissu a rializzazioni di stu librettu,  
M. Yves Conventi, Mma Marie-Pierre Bianchini è M. Jean Luzi

# Sunta

Clementina è pumelu .....	5
Castagna .....	11
Casgi .....	17
Vigni è vigneti .....	23
Mele .....	29
Robba purcina .....	35
Oliu d'aliva .....	41

Clementina  
è  
pumelu




# Clementina è pumelu



## A CLEMENTINA

A clementina corsa hè a sola clementina di Francia. Si cunnosce à e so fronde longhe è fine, à a so lucianza è à a so buchja fine arancinu-verde di culore. Issu billissimu fruttu, chì face da 5 à 8 cm di diamitru, hè à pena **acidulu** è a so polpa hè senza niciole.



## U PUMELU

U pumelu hè un pocu più grossu, chì pò misurà trà 8 è 14 cm di diamitru. A so buchja hè gialla è a so polpa rossa-rusulata. Pesa in media trà 300 è 400 g, ma certi frutti ghjunghjenu à le volte à u chilò !

## I BENEFIZII NUTRIZIUNALI...

Clementina è pumelu sò carchi à vitamine C, pruvitamine A, carotene è pigmenti **antiussidanti**. Ghjovanu cusì da luttà contru à a stanchezza è favoriscenu a bona salute di a pelle. Tenenu dinò parechji uligu-elementi cum'è u putassiu, u magnesiu è u calciu. Calurie ne anu pocu è micca : 20 à 25 chcal à fruttu è basta !



## DUI FRUTTI NATI DA UN MATRIMONIU FELICE


A clementina vene da una cruciatura trà un aranciu è un mandarinu. Fù scuparta in Algeria da u padre Clément chì li dede u so nome in u 1920. Fù intrudutta ind'è noi in u 1925 da Don Filippu Semidei chì puni u primu clementinu à u Ficaretu, in piaghja urientale.



In quant'è à u pumelu, hè natu da una cruciatura trà un pumpelmu è un aranciu fattu in u 1963 in e Caraibe. Ìn hè cà in u 1990 chì l'agricoltori corsi si sò dati à cultivà issu fruttu, in particolare a varietà à polpa rossa chjamatà « Star ruby ».

# Clementina è pumelu

A clementina è u pumelu appartenenu à a famiglionu di l'agrumi. L'agrumi, par via di l'aranciu, sò i frutti i più cultivati in u mondu. Pussedenu sprichji chì tenenu buscichelle piene di suchju.



I frutteti di clementine è di pumeli sò situati anzi tuttu nantu à e pendite dolce di a Piaghja Orientale. A qualità di i tarreni è u clima sò à favore di una cultura tradiziunale chì rispetta l'ambiente. Si face in splutazione familiare di 10 ettari in media.



## IDINTIFICÀ A QUALITÀ

À a clementina di Corsica li anu datu, da u 2007, una IGP (indicazione giografica protetta). Issu labellu aurupèu assicura a prutezzione di a so origine in u mondù sanu è garantisce un livellu massimu di qualità è di frischezza. È clementine corse sò colte à a manu quand'elle sò belle mature. Ìn sò tocche da nisun trattamentu chimicu dopu colte è sò spachje in menu di 6 ghjorni ! À parte si da u 2012, u Pumelu di Corsica prufittarà ancù ellu di una IGP.




## A CUGLIERA

A cugliera di e clementine si face da a fin d'ottobre è l'entre di ghjinnaghju. Quella di u pumelu, invece, hè più tardiva : d'aprile sin'à u mese di ghjunghju !



© Jac Perrichon



## UNI POCHE D'AGRUMI

A mandarina, l'aranciu, u pumpelmu, l'alimea, u kumquat, a bergamotta...

# SFRUTTERA



## LESSICU

**Acidulu (Acidulé)** : à pena acidu di gustu.

**Albedu (Albédo)** : stratu spessu, biancu è spungosu di a buchja.

**Antiussidante (Antioxydant)** : sostanza chimica chì face andà più pianu a distruzione di e nostre cellule.

**Buchja (Écorce)** : inseme di u buchjulu è di l'albedu.

**Bùchjulu (Zeste)** : stratu superficiale è culuritu di a buchja.

**Labellu (Label)** : ricunniscenza ufficiale.

**Niciola, granella (Pépin)** : grana di un fruttu.

**Polpa, pulpa (Chair)** : parte culurita di u fruttu custituita da buscichelle à suchju.

**Sprichju, spechju (quartier)** : parte di a polpa delimitata da una tramizana.

**Tramizana / lezina (Cloison)** : pelle fine chì delimitegħha in a polpa i sprichji.

**Vitaminina (vitamine)** : sostanza chimica nicissaria à a vita.

## DUCUMENTI

Rughjone di pruduzione di a clementina in corsica

Pruduttori (in %)

PIAGHJA ORIENTALE

56

CASTAGNICCIA / MARE È MONTI

36

RUGHJONE BASTIACCIU

5

MEZIORNU STREMU / ALTA ROCCA

1.7

RUGHJONE AIACCINNU

1.3

TUTALE

100

## DUMANDE

1 - Dopu cercu a definizione di a parolla "ibridu" ind'un dizziunariu, spieca parchè ch'elli sò chjamati ibridi da i scientifici a clementina è u pumelu.

2 - Dopu avè trovu nantu à una carta i rughjoni di u tavulellu sopra qui, indetta quelli chì pruducenu u più clementine.

3 - U pumelu sarà pruduttu in u stessu rughjone ? Cumu sarà ?

4 - Saranu listesse l'epiche di pruduzione ?

5 - A clementina hè un statutu, qualessu ?

# Castagna



# Castagna


A castagna hè di sicuru u fruttu liatu u più, in capu à a ghjenti, à a sicutà corsa tradiziunali.

## A TRASFURMAZIONI DI U FRUTTU

S'edda hè, a parti maiò di i castagni colti, trasfurmata in farina chì entri in parechji ricetti tradiziunali o muderni, una quantità hè dinò accantata par prudutti dirivati com'è a cunfittura, a crema, u dolci o i biscuttini è biscotti, l'alcolu, a biera, a castagna secca o fresca, magnata buddita (pilati o baddoti) o arrustita (fasgioli).



In Corsica è ancu in altrò, u castagnu hè chjamatu « arburu pani ». Pasquale Paoli, u Babbu di a Patria, dicia à stu sughjettu : « Tantu chì no avaremi castagni, t'avaremi pani ! ». Si pò capiscia tandu l'impruntenza di a pruduzzioni castagnina pà i Corsi di i tempi scorsi.



## PRUVERBIU



## UN POCU DI STORIA


Stu vechju pruverbiu ci ramenta chì a farina castagnina, chì ghjuvava da fà a pulenta (pani di legnu), è l'acqua (vinu di petra) erani i fondamenti di u magnà di a nostra vechja sucità **campagnola**. Mentre i tempi di poca pruduzzioni, u Corsu a si francava da Mamma Piera (a fami nera) cù u fruttu di u castagnu.

Si sà oghji, cù i prilevi fatti ind'a puzzina di u Lavu à Crena, ch'un antinatu di u nostru castagnu era dighjà prisenzi in Corsica 7 000 anni fà. Ma attenti, i primi castagneti com'à no i cunniscimi oghji, sò u risultatu di a pulitica agricula ghjinuvesa (coltivazione) chì mittia in l'obbligu l'isulani, minaccendu li di tassi, di pona castagni ed alivi sicondu l'altitudini. L'arburu, puri **rusticu** ch'eddu hè, l'hà corsa brutta cù l'**esudu rurali** cunnisciutu da a Corsica à u xx<sup>mu</sup> seculu : i castagneti funi abbandunati à i malatii, à a mancanza di curi di l'arburi è di u tarrenu, ma funi ancu missi in mani à i sigantini. Furniani in legni l'usini chì ni cacciava u **taninu**.

S'hè cuntatu in Corsica 50 razzi di castagni almeno !

# Castagna

## U MULINU




## IDINTIFICÀ A QUALITÀ



Toccu l'annu 2006, a farina castagnina corsa binifizieghja d'un Appillazioni d'Orighjini Cuntrulata. Stu labellu garantisci l'urighjini di i frutti ma dinò una manera sputica di fà pà a trasfurmazioni di u pruduttu. Senza sti dui carattaristichi di primura, u gustu di i prudutti cummicializati ùn saria quiddu ricircatu da i cunsumadori. Par cunsirvà stu savori, sò vinduti par obligu sottu biotu i farini castagnini AOC ind'i cummerci. Si poni truvà dinò in sacchettu à l'uccasioni di i fieri o in vendita diretta ind'à u pruduttori.

Ind'u 2010, l'AOC diventa Appillazioni d'Orighjini Prutetta. U pruduttu teni avà una **cirtificazzioni** è una prutizzioni aurupei.



## UNI POCHE DI CIFFRÌ

2000 ettari colti, 1 000 tonni di frutti colti, 250 tonni di farina prudutti, 34 mulini in attività (28 in corsica Suprana è 6 in Corsica Suttana), 232 cumuni sani sani in AOP è 37 cumuni in parti, 80 agricultori campendu prima di a castagna...

Un beddu risultatu quand'omu pensa à ciò ch'edda raprisintava l'attività nanzu à u 1970, ridutta à nienti da l'esudu rurali ! Uni pochi d'omi ani da participà à a so riabilitazioni è, in l'annati 80, a filiera **castagnaghja** ritruvarà a so piazza in l'agricoltura muntagnola. A prima Fiera di a castagna, in Bucugnà, l'hà da cunsacrà ind'u 1983.

## UNI POCHE DI PIATTI TRADIZIUNALI FATTI CÙ UNA FARINA SENZA GLÙTINI !

**A pulenta / pulenda :** lea d'acqua, di farina stacciata è d'un pocu di sali, cotta ind'una paghjola. Si magna à fetti, caldi cun ovi, brocciu è ficateddu. Si tastichjegħha ancu u lindumani fritta cù appena d'oliu d'aliva.

**I nicci o pisticci :** vultati di farina castagnina cotti, sicondu a tradizioni, nant'è farri scaldati.

**I granaghjoli o brilluli o farrichjuli :** pulenta liquida è un pocu aggrumbulata chì si magna calda annacquata da latti caprunnu fretu. Una presa di sali pò rialzà u piattu.



# SFRUTTERA



## LEXIQUE

**AOC** : Appellazioni d'Orighjini Cuntrullata / Appellation d'Origine Contrôlée. Cirtificazioni data da un paesi à prudutti fatti sicondu normi di fabricazioni pricisi (urighjini luchali di u pruduttu, fabricazioni sicondu reguli difiniti...). / **AOP** : Appellazioni d'Orighjini Prutetta / Appellation d'Origine Protégée : cirtificazioni data da l'Europa à prudutti fatti sicondu normi di fabricazioni pricisi.

**Castagnaghju / castanécole** : chì và liatu à a castagna.

**Cirtificazioni / certification** : attribuzioni d'un'appellazioni à un pruduttu di qualità ricunisciuta.

**Esudu rurali / Exode rural** : tempu di quandu l'abitenti lascioni i campagni da stabbiddiscia si ind'i cità.

**Pasquale Paoli** : figliolu di u patriottu Ghjacintu Paoli, Pasquale piglia a testa di u muvimento di rivolta contru à i Ghjinuvesi, numinatu ch'eddu hè Capighjinirali di a Nazioni. Cumbatti dopu l'armata francesa vinuta da annissà l'isula. Guverna da u 1756 à u 1769 po piglia a strada di l'isiliu in Inghiltarra dopu a disfatta di Ponte Novu contru à l'armati di u Rè di Francia Louis u XV. Sarà chjamatu da a Custituenta dopu rivuluzioni è sarà accoltu quant'à un aroiu di a libartà. Sarà cusì numinatu à u capu di a Corsica divintata francesa.

**Prudutti cirtificati / produits certifiés** : pruduttu chì hà avutu una cirtificazioni data da i puteri pubblichi, com'à un'AOC o un'AOP.

**Razzi trovi** : Alisgianincu, Ariata, Arizinca, Bastilicacciu, Campana, Campanari, Campanesi, Carpinaghja, Chjina, Farretu, Frisgiata, Furcutoni, Ghjallu, Ghjecatoghju, Ghjintili, Ghjintiloni, Insetu, Insetu pitrinu, Insetu pinzutu, Insitina, Leccia, Nucedda, Maceghja, Marrunaghja, Minuta, Murianinca, Murasgioni, Palatina di Monte, Palatina Prunaccia, Petra, Petra Farrigna, Pianedda, Pilosa, Pitrina, Povaru Pà, Ratacampana , Ratulacciu, Rossa, Rossa canali, Rossa pilosa, Russuccia, Rossula, Russella, Russina, Terra Magnese, Tighjulana /Tegħja, Tricciuta, Vinachesi, Vicu, Zittimi.

**Rurali - campagnolu / Rural** : chì và liatu à a campagna.

**Rusticu / Rustique** : , risistentu, adattu à u clima crudu è à u so ambienti.

**Taninu - tinta / tanin** : sostanza vighjitali ch'omu adopra da cuncìa i peddi.

## DUC

u lamentu di u Castagnu à u Corsu – Paoli di Tagliu – A muvra 1926

Or chì l'averaghju fattu  
À lu Corsu cusì ingratu  
Chì m'hà fattu la sintenza  
È à morte cundannatu  
Senza sente tistimonii  
Nè cunsultà lu ghjuratu.

Subbitu tagliatu à pezzi  
È per mette mi in pappina  
Chjami li to mulatteri  
Per cunduce mi à l'usina  
O Corsu rifletti è pensa  
Chì faci la to ruina!

Facii porte è purtelli  
Sulaghji, casce è cascioni  
Intempiavi la to casa  
Tù cù travi è cantilloni  
Grazia, o corsu, eppur la sai  
À li mio gran figliuloni.

Guarda quante pimpasculate  
Quanti colpi aghju paratu !  
Da la fame quante volte  
O corsu, t'aghju salvatu !  
Ed avà da gran nemicu  
Versu mè sì dichjaratu.

## QUESTIONNAIRE


- 1 - In chì prudutti hè trasfurmata a parti maiò di i frutti colti ?
- 2 - Sicondu certi studii, asistia u castagnu nantà l'isula nanzu à Cristu ?
- 3 - Cita di menti 5 prudutti fatti cù a farina castagnina.
- 4 - Parchì sarà vinduta sottu biotu a farina in AOC ?
- 5 - Legħji u ducumentu qui sopra : chì dici à u Corsu u castagnu ? Spieca strufata à strufata.

# Casgi



# Casgi

In Corsica, sò e pecure è e capre chì danu u latte.



## E PECURE CORSE

A pecura corsa face parte, cum'è a pecura sarda, di e razze **lanose** maditerranie. A so origine hè vechja assai. Latte ùn ne pruduce tantu, par via ch'ella hè chjuca abbastanza è ch'ella ùn pesa cà 35 chg. Ma quellu, invece, hè grassu assai. Hè una razza rustica, chì pò marchjà ore è ore sane. Campa à bande di 200 **capite** in media. Hè tinutu una carattaristica unica in Europa : hè a sola razza duv'ellu ci hè parechji culori di pilame : neru, biancu o rossu. In u 2010, si cuntava 147 000 capitì chì 98 000 eranu pecure di figlia (fonte statistiche agricule annuale 2010).



## E CAPRE CORSE

In u 2003, a razza capruna corsa fù ricunnisciuta da a cummissione Naziunale di Migliuramentu\*. A capra nustrale hè un animale di latte **rusticu**, adattu è l'ambienti parechji ch'ella prupone l'isula, quant'è crudi ch'elli sianu. U so pesu muta in giru à i 40 chg pà e femine è i 55 chg pà i masci. Hè carattarizata da un capu fine è da arechje chjuche. Fasciata da peli longhi o mezi longhi, i so culori vanu da un pilame rossu, ceriu, cenneratu o neru à quelli frisgiati bianchi o di parechji culori. In u 2010, si cuntava 45 000 capiti chì 30 000 eranu capre di figlia (Fonte : Statistiche Agricole Annuale 2010).



« DIPOI SEMPRE, A CAPRA CORSA HÀ DATU U SO LATTE, U SO PELU PÀ FÀ PILONI È FUNE È SIN'À E SO CORNE DA FÀ CULTELLE È STRUMENTI DI MUSICA. »

## U CASGIU

Casgiu si ne face in a Corsica sana ma à scale sfarente. I pruduttori si aduniscenu è si danu di più in più à fà robba di qualità chì si pò idintificà bè, in leia cù u so rughjone. U casgiu corsu si face cù u latte crudu, di regula à pasta molla è **staghjunata**, fora di u casgiu sartinese chì a so pasta hè sprimuta.



\***Cummissione Naziunale di Migliuramentu** : cummissione chì aiuta u ministeru di l'agricultura in a so azione da migliurà e razze.

# Casgi

## U Calinzana

Casgiu caprunu à caghjatu solfice è à crustula lavata. Si face in i lochi d'impiaghjera di u Marsulinu è di u Falasorma è in Calinzana.

## U Niolu

Casgiu picurinu o caprunu à caghjatu solfice è à crustula lavata. Si face anzi tuttu in Niolu, in a valle di u Golu è in u Curtinese.

## U Bastilicacciu


Casgiu picurinu o caprunu à caghjatu solfice è à crustula naturale. Si face anzi tuttu in e piaghje di a Gravona è di u Prunelli.

## U Venachese

Casgiu picurinu o caprunu à caghjatu solfice è à crustula lavata. A so pruduzzioni (circa 25 tonni à l'annu) hè anzi tuttu **pastureccia**, è si face in i rughjoni di Corti è di venacu.

## U Sartinesu

Casgiu picurinu o caprunu à caghjatu sprimutu micca cottu. Si face in a valle di Taravu è in u Meziornu Stremu di l'isula. A muntagnera a facenu nantu à u pianu di u Cuscionu.



Fonte ILOCC : Interprofession Laitière Ovine et Caprine de Corse.

## PARECHJI STAGHJUNAMENTI, PARECHJE CRUSTULE

- Crustula lavata : casgiu strufinatu, manighjatu è lavatu cù a manu croscia guasgia tutti i ghjorni.
- Crustula naturale o fiorita : casgiu vultatu tutti i ghjorni ma micca lavatu.
- Crustula spessa : casgiu più duru è più seccu postu chì a pasta hè sprimuta.



## U BROCCIU



U brocciu hè un casgiu duv'ellu entre pà u più u **seru**. Fattu cù u latte caprunu o picurinu, o à le volte cù un mischiu di i dui, hè u solu **latticime** corsu ad avè ricivutu un'Appellazione d'Origine Cuntrullata. Par via di st'appellazione, i pruduttori sò custretti à un aduprà cà latte di pecure è capre di razza corsa.

*Casgiaghja tradiziunale di ghjuncu* →



## UN PRUDUTTU DI L'ALTRU MONDU !

A manera di fà u brocciu saria un orcu ad avè la data à l'omi ! Quellu campava dipoi i tempi di i tempi in a so casa di petra è, s'ellu spartia a so robba cù l'omi, ricusava sempre di dà li u modu di fà u brocciu. I pastori u chjapponu è u strazionu sin' à fà lu palisà u so secretu è à tumbà lu. Sta fola a truvemu in parechje pieve ma hè in u Nebbiu ch'elle sò e so più belle stampe : duie stazzone chjamate « a casa di l'orcu » è « a casa di l'orca » chì, sicondu a tradizione à bocca, saria a casa di a mamma.

## CUMU SI FACE U BROCCIU

Dopu fattu u casgiu, si ricute u seru (chì hè sguttatu) è si aghjunghje un pocu di latte frescu, u **puricciu**. Issu mischiu và scaldatu à 75 o 80°C, è u brocciu affaccà à pocu à pocu à gallu (si dice ch'ellu fiurisce). Cù una cochja o una mescula, si piglia tandu è si mette in **casgiaghje** (o **fattoghje**) duv'ellu risposa qualchì tempu. Si pò mangħjà frescu (crudu o tepidu) o passu.

# SFRUTTERA



## LESSICU

**Staghjunamentu (affinage)** : quand'ellu compie di maturà, d'invichjà un casgiu.

**Latticime (laitage)** : robba fatta cù u latte (casgiu, brocciu, iaurti...).

**Càpite** : e bande si contanu à capite, 200 capite sò 200 capre o pecure

**Fattoghja/casgiaghja (faisselle)** : forma duv'ellu si mette à sguttà u casgiu. Prima eranu in ghjuncu, è avà sò in plasticu.

**Lana (jarre-jars)**

**Lanuta (jarreuse)**

**Seru (Lactosérum, petit-lait)** : liquidu chì ferma dopu caghjatu u latte.

**Puricciu** : latte frescu ch'omu aghjungħje à u seru da fà u brocciu.

**Pruduzione pastureccia (production fermière)** : fatta da u pastore ellu stessu, cù u latte di a so banda è nantu à a so splutazione.

**Rusticu (rustique)** : rubustu, risistente, adattu à u clima crudu è à u so ambiente.

## PRUDUZZIONE LATTAGHJA IN CORSICA

Statistiche 2010		Effettivi femine di latte	Pruduzione (in milioni di litri)
Pecore	Cismonte	70 700	8
	Pumonte	24 000	3
	Corsica	94 700	11
Capre	Cismonte	34 900	4
	Pumonte	10 800	1
	Corsica	45 700	5

Fonte : statistiche agricole annuale 2010, Agrest

## DUMANDE

- 1 - Qualessu hè u solu latticime ad avè ricuvutu u AOC ?
- 2 - Chì sò e duie razze di latte trasfurmate in Corsica ?
- 3 - Quantu ci hè variità di casgi corsi ?
- 4 - Ci hè di più capre o pecure in Corsica ?
- 5 - Qualessu hè u solu latte ch'ellu pò aduprà un pastore par fà u so brocciu in AOC ?

Vigni  
vigneti



# Vigni è vigneti

I particularità giugraffichi di a Corsica, a divirsità tamanta di i tarreni è di l'altitutini, u clima particulari quant'à a prisenza d'uvizami adatti, facini di a nostra isula una tarra di vigni !

## U VINU CORSU

Longu à i seculi, i **vignaghjoli** corsi ani adattatu i so tecnichi da crià un vinu di qualità rimumata. Ani rifattu i vigni antichi di i so babbi è missiavi, ani postu vigni novi senza abbandunà l'uvizami **tradiziunali**. Ani adattatu i tecnichi muderni di vinificazioni po sò andati à a cunquista di i **marcati** malgradu a poca cunniscenza ch'eddi t'aviani i stribudori è i cunsumadori furisteri. Dipoi l'anni 1990, sforzi maiò sò stati fatti da turrà à dà à u vinu corsu a piazza chì era a soia.



## L'UVIZAMI

U nomi d'uvizami hè datu à una razza di calzu chì si ricunnosci à a forma di a so pampana (cascia) è di i so caspi. Ogni uvizami t'hà u so gustu particulari. In Corsica, più di **30 uvizami** sfarenti erani o sò sempri cultivati da i vignaghjoli. À mezu à eddi, 3 razzi (o variità) entrini ind'a cumpusizioni di 9 Appillazioni d'Orighjini cuntrullati.



## U NIELLUCCIU

U Niellucciu (da nieddu, neru), ben cunnisciutu in patrimoniu, hè un uvizami adattu à i **tarreni calcarii**. Si trova ancu nant'à a Costa Uriintali ma entri ind'a cumpusizioni d'altri vini in AOC. Raprisenta 35% di i stesi posti à vigna.



## U SCIACCARELLU O SCIACCAREDDU

U sciaccareddu (da sciaccà) hè un uvizami sputicu corsu. Cresci nant'à i **tarreni granitichi**, in particulari ind'i rughjoni d'Aghjacciu è di Sartè. Raprisenta 15% di i stesi posti à vigna.

## U VERMENTINU / VARMINTINU O MALVASIA / MALVASIU

U varmintinu hè un uvizami biancu chì permetti a pruduzzioni di vinu biancu di prima trinca. Raprisenta 17% di i stesi posti à vigna.



## VINI ROSSI, BIANCHI O CHJARASGIOLU

- **u vinu neru** (dettu oghji **vinu rossu**) hè isciutu di a budditura di l'uva calpighjata. Hè a manera antica di fà, u fruttu sendu ghjustu calpighjatu dopu vindemia.
- **u vinu chjarasgiolu** hè isciutu d'una budditura spicifica. Difatti, uvi à suchju chjaru sò missi in palmentu sin'à ch'eddu sia attinutu u culori vulsutu. Dopu, si trabucca u liquidu solu ind'un antru palmentu di budditura.
- **u vinu biancu** hè u risultatu d'una budditura di u suchju d'uva spiccatu da a **caspacciula** è da a **buchja**.

# Vigni è vigneti

## UN POCU DI STORIA

A storia di a vigna in Corsica si perdi ind'a notti di i tempi. Nanzu à l'introduzzioni supposta d'uvizami novi toccu l'Antichità, assistia dighjà nant'à l'isula una razza salvatica chì s'appiccava à l'arburi, chjamata Lambrusca ind'i cuntonni aghjaccinchi. 600 anni nanzu à cristu, i Grechi ani parlatu di u vinu d'Alalia (chì divintarà Aleria). virghjiliu ancu eddu vantava i qualità di u vinu di Balagna ! Pisani è Ghjuvesi facini listessu...

Truvemi, citatu toccu a fini di u xix<sup>mu</sup> seculu ind'u rincensu di i vini francesi rinumati, i vini rossi di u capicorsu è di Sari (in cinarca). u restu di i vini corsi ùn hè presu in cunsiderazioni è ni cunniscimi a raghjoni : u studiu suvita di pocu una calamità chì tuccò, ind'u 1870, parti è più di i vigneti corsi, u filosserà.




## 1870 : U SCUMPIENTU

Dopu à u scompiu di i vigni isulani, l'omi si fecini curaghju è, à marzè di a punera d'uvizami americani risistenti à a malatia, si feci una pruduzzioni bona toccu a fini di u seculu. Hè insitendu sti calzi stragneri cù maglietti lucali ch'eddi funi salvati da una sparizioni difinitiva ciò chì faci a ricchezza di i nostri vini d'oghji : l'uvizami corsi adatti à u nostru clima è à i nostri tarreni. Di l'epica, a Corsica teni à menti un ghjastemu ch'omu lampava à quiddu ch'omu vulia maladiscia : *Ch'eddu ti venghi u filosserà !*



## IDINTIFICÀ A QUALITÀ



9 AOC sò scumpartuti nant'à a custera isulana :

L'AOC permetti di cunnoscia u pruduttu di manera parfetta.

L'Appillazioni metti u pruduttori in l'obligu d'aduprà, sicondu u rughjoni di a so splutazioni, un certu uvizami è un metodu di vinificazioni difinitu.

I vini di Paesi rapresentini i 3/4 di a pruduzzioni corsa. Si sfarinzieghja in sta dinuminazioni :

- **i vini d'uvizami**, fatti d'una bulighjata d'uvizami corsi è altri.
- **i vini di Paesi Primaticci**, cummircializati toccu u terzu ghjovi d'uttrovi !

## UNI POCHE DI CIFFRÌ

- 9 AOC
- 2 IGP (vini di paesi, 60% di a pruduzzioni corsa, 2715 ettari)
- 120 - 140 M€ di cifra d'affari
- 278 pruduttori
- 1 500 implechi diretti
- 1ma spurtazioni isulana in valori è vulumi.
- 2 750 ettari in AOC è 2715 ettari in IGP
- Pruduzzioni à l'annu : 370 000 ettolitri

# SFRUTTERA LESSICU



**AOC** (Appellazioni d'Orighjini Cuntrullata / Appellation d'Origine Contrôlée) : cirtificazioni data da un paesi à prudutti fatti sicondu normi di fabricazioni pricisi (urighjini llocali di u pruduttu, fabricazioni sicondu reguli difiniti...) / **AOP** (Appellazioni d'Orighjini Prutetta / Appellation d'Origine Protégée) : cirtificazioni data da l'Europa à prudutti fatti sicondu normi di fabricazioni pricisi...

**Budditura, bulloriu, bullore / fermentation alcoolique** : in l'ambienti privi d'ussigena, i battarii trasformani u zuccaru in alcolu.

**Buchja/peau du raisin, pellicule.**

**Caspacci/rafle** : pidonculu d'una caspa d'uva.

**Filosserà / phylloxéra** : insettu strughjitoru intruduttu par disgrazia ind'u 1869 ind'un vignetu corsu da maglioli vinuti d'una pianinaghja di Bagnols-sur-Cèze (Gard).

**Marcati / marchés** : zona giugraffica induv'eddu si faci u cummerciu di prudutti (marcatu inglesi, francesi, aurupeu...).

**Stributori / distributeurs** : sucità in carica di a stribuzioni di i prudutti nant'à i marcati.

**Tarreni calcarii / Sols calcaires** : tarreni pocu acidi ch'omu trova ind'a parti a più suttana di l'isula (Bunifaziu) è intornu à San Fiorenzu (Patrimoniu).


**Tarreni granitichi / Sols granitiques** : tarreni acidi scumpartuti à u meiornu è à u punenti di l'isula.

**Tradiziunali / traditionnel** : si dici d'un'attività praticata da un rughjoni dipoi i tempi i più landani è faci parti cusì di a tradizioni di u locu.

**Uvizami -uvizati / cépages** : Aliericu ; Alicante ; Ancelottu ; Agnula ; Barbaresca ; Barbirossa ; Bianconi ; Biancu Gentile ; Brustianu ; Carcaghjolu Biancu ; Carcaghjolu Neru ; Chasselas ; Carcamanu ; Carcamulu ; Cinsaut ; Cudiverta ; Fravula ; Ghjinuvesi ; Ghjiru ; Grenache ; Malvasiu /Varmintinu ; Muscatu ; Muscatellone ; Muscatellucciu ; Minustellu ; Mirlaghju ; Mourvèdre ; Niellucciu ; Pisulanu ; Paga Debiti ; Raffaellone ; Rosula ; Ruguglione ; Riminesi ; Rosula Bianca ; Rusoghju ; Sanghjuvelu ; Sciaccarellu / Sciaccareddu ; Syrah ; Tintaia ; Zumpinu...

**vignaghjolu / vigneron** : parsona chì cura a so vigna o pussedi una splotazioni viticula.

## DUC : SVILUPPU DI A PRUDUZZIONI NANT'À 30 ANNI



## DUMANDI

- 1 - Comu si ricunnosci un uvizami ?
- 2 - Qualessi sò i 3 uvizami principali di l'AOC corsi ?
- 3 - Par fà u vinu rossu, ci voli uva rossa solu. Vera o falza ?
- 4 - Chi hè st'insettù chì, guasgi guasgi, strughji sani sani u vignetu corsu ?
- 5 - Cummenta u tavuleddu qui sopra. Chi rimarchi ?

# Mele



# Mele

U mele hè un pruduttu inzuccaratu, fattu da l'ape dopu ch'elle avissinu racoltu l'amacu è u nettare di i fiori. U so culore cambia da u giallu à u brunu. Tutte e piante ch'elle suchjanu l'ape sò spezie dette *melifere*. L'ape piglianu dinò u melatu, chì ghjè una sostanza ch'elle pruducenu e tampe dopu avè manghjatu u suchju di l'arburi.



L'apa suchja u nettare di i fiori da aduprà ne u zuccharu. A so quantità cambia sicondu e cundizione climatiche.

In Corsica, par via di u clima è di a diversità di a vegetazione, l'ape trovanu da suchjà guasgi tutta l'annata. Piante è fiori meliferi ci n'hè 2 800 spezie chì 127 sò **endemiche**. Sò i diversi nettari chì anu da dà à u mele a so carattaristica : u so gustu, u so culore è u so aspettu liquidu o cristallizatu.

L'apicoltore hè quellu chì alleva l'ape da racoglie ne u mele. Da sfruttà tutte e spezie di piante, face muntagnà i so bugni. In media, a suparficia di suchjera di un'apa currisponde à 3 chm<sup>2</sup>, sia 30 ea.

## IDINTIFICÀ A QUALITÀ



Da u 1998 in quà, a filiera apicula hè ricivutu una certificazione AOC Miel de Corse-Mele di Corsica, chì garantisce a so qualità è a sputichezza di u so rughjone. È po, in l'annu 2000, a pruduzione hè stata ricunnisciuta à livellu di l'Europa cù una **AOP**.

## UN POCU DI STORIA

Dighjà in tempu di l'Antichità, l'omu cuglia u mele in a natura. u pigliava in e livature in i fusti di l'arburi o à quelle appese à e rame.

Era ricircatu da l'omi par via ch'ellu facia prò à a salute è ch'ellu si cunsirvava assai.

L'adupravanu invece di u zucaru è ancu in e priparazione midicinale. Era rinumatu pà e so virtù curative (cicatrizzazione...).

In Corsica, hè  
ghjuvatu da longu  
tempu in i baratti  
trà gruppi è cum'è  
impositu in tempu di  
a presenza rumana.



## UNA BELLA DIVERSITÀ

Ci hè 5 varietà di mele corsu chì currispondenu à stagione è à rughjoni sfarenti. A racolta di u mele si face nantu à 3 grande stagione.

Di veranu, ci hè u mele di veranu (talavelli, clementini) è quellu di machja di veranu (scopa, piumbone, ghjinestra) chì sò di culore chjaru è di gustu dolce.


Pà a statina, si trova u melatu di a machja (muchju, leccia, calitu), u mele di castagnetu (lamaghja, viltalba, nepita,) è quellu di a machja di statina (arba barona). Si tratta di mele di gustu più forte è cacciata da spezie suchjate à le volte in altitutine.

# Mele

## U BUGNU

U più à spessu, i bugni sò cumposti d'elementi accatastati. Parmette di tene quatri mobili chì sò razze di tavule cù cantare duv'è l'ape anu da accantà u mele. Piene ch'elle sò, l'ape fascianu e cantare cù un stratu di cera da prutege le.

Hè ind'isse  
scatule  
ch'omu  
appende  
i quattro  
duv'elle  
lascianu u so  
mele l'ape





## A RACOLTA DI U MELE

Da caccià in sicureità i quatri pieni di mele appesi in u bugnu, l'apicoltore affumaticheghja l'ape. Par quessa, ùn adopra cà robba naturale : pinaculi, fronde di calitu è rosumarinu. Caccia dopu u stratu di a cera cù un cultellu fattu à posta. Tandu u mele pò esse cacciato da e cantare po culatu par caccià tutti i so brusgiuli. Dopu ripusatu uni pochi di ghjorni, hè messu ind'un buccale.

In Corsica, u bugnu dà in media 25 chg di mele, ciò chì raprisenta una pruduzione rigiunale di circa 270 tonne di mele AOP. Oghje ghjornu, a filiera apicula vole sviluppà a so pruduzione migliurendu frà altru a formazione di l'apicoltori, a silizzone di l'ape è turnendu à valurizà u prezzu di u mele.



↖ Stratu di cera :  
ghjova da prutege  
e cantare piene à  
mele

Mele

Nidu o cantara  
di cera

Sò l'ape chì facenu e cantare in forma d'esagunu, da mette ci l'amacu è u nettare racoltu. Dopu sbattuleghjanu di l'ale par fà siccà, è tandu si forma u mele.

# SFRUTTERA



## LESSICU

Meliferu (mellifère) : una pianta melifera hè una pianta chì prude una sostanza ch'ella hà da suchjà l'apa da fà u mele.  
Endemicu (endémique) : qualificativu di ciò chì ùn esiste cà ind'un locu.

AOC : Appellazione d'Origine Cuntrullata. Certificazione data da un paese à prudutti chì rispondenu à norme di fabricazione pricise assai (origine lucale di u pruduttu, fabricazione sicondu regule difinite...) / AOP : Appellation d'Origine Protégée. Certificazione data da l'Europa à prudutti di qualità chì rispondenu à norme pricise assai.

## DUCUMENTI


	2A	2B	Corsica
Pruduttori	36	53	89
Bugni	3 775	7 677	11 452
Pruduzione (chg)	101 444	230 257	331 701

Fonte : Sindicatu AOC Miel de Corse- Mele di Corsica 2010

## DUMANDE

- 1 - Chì suchjanu l'ape ?
- 2 - Quantu ci hè variità di mele in Corsica ?
- 3 - Ogni variità di mele hè sfarente di gustu è di colore. Cumu hè ?
- 4 - Cumu si chjama u fattu di purtà un bugnu da un locu à un antru ?
- 5 - Chì rimarchi studiendu u tavulellu ?

# Robba purcina



# Robba purcina

A robba purcina tradiziunali di Corsica, com'eddu a ci dici u so nomi, hè fatta cù a carri di u porcu è basta.

## UN GUSTU SENZA PARA

Veni, in più di a razza di u porcu, di l'ultima tappa di u so addevu. Toccu u vaghjimi po ind'una parti maiò di l'inguernu, i porchi magnani i frutti di u castagnu o di a leccia, cascati in tarra. Sta magnusca ricca ricca faci ch'eddu ingrassa l'animali è ch'eddi pigliani i tissuti adipossi è musculari tutti i carattaristichi chi ni farani un pruduttu gustosu.


## A RAZZA CORSA : NUSTRALE

Nativa di l'isula, sta razza hè ricunnisciuta ufficialmenti causa à u travagliu d'unipochi d'appassiunati chì ni ani difinitu i criteri sputichi. U culori hè neru pà u più. L'arechji sò penciuli o mezi penciuli, a so taglia hè mizana cù un spinu attundulitu è cortu.

A so criscenza hè longa. Hè un porcu adattu à l'addevu stinsivu è à i carattaristichi di u paesi nativu.



A robba purcina corsa hè cunnisciuta da tutti. Truvemi, ind'è i pruduttori o i cummircenti, 5 prudutti principali :



## U FICATEDDU (O FICATELLU)


U ficateddu hè fattu di fecatu, d'ammazzami, di magru è di grassu di porcu tazzati. S'addiziunegħja u sali è u pevaru po s'introduci stu mischiu ind'i minuci (stintini). I ricetti sò varii quantà i righjoni : certi aghjugnini appena di vinu induv'eddu ci hè statu appena d'agliu à mogliu, altri mettini arumati, affumichegħjani o micca u pruduttu. U ficateddu si magna frescu (hè tandu arrustitu) o seccu.

## A COPPA (O CÒPPATA O PULPONE)

A coppa hè fatta cù a schiena di u porcu. Parti è più di u tempu, hè salita à sali seccu. Certi pruduttori mettini a coppa à mogliu ind'un mischiu di vinu è d'arumati nanzu di fà la entra ind'un budeddu grossu è di lià la. U pruduttu hè calchi volta affumicatu. Dopu una siccata longa (4 à 5 mesi à u minimu), a coppa si magna cruda.



## U LONZU



U lonzu si faci com'è a coppa ma a carri usitata hè, com'eddu l'insegna u so nomi, u lonzu di u porcu. Hè ancu eddu magnatu crudu, siccata fatta.

# Robba purcina



## U SALAMU (O SALCICCIA)

U salamu hè fatto cun carri rossa è lardu tazzati à pezzi grossi. U mischju fatto, ci si metti sali è pevaru. U tuttu hè impastatu, missu ind'i minuci poliatu in punta. S'affumicteghja o micca, sicondu l'usu di u rughjoni, po hè missu à siccà.

## U PRISUTTU

U prisuttu (a coscia), una volta tagliatu, hè sbarazzatu da u sangui ch'eddu cunteni. Hè andu cupartu sanu sanu di sali è lasciatu ind'un salatoghju. U tempu di a salata cambia sicondu u pesu di u prisuttu frescu. Ci voli, in media, una vintina di ghjorni. Dopu, hè lavatu cù l'acqua, siccattu è impivaritu. Hè calchì volta affumicatu po hè missu in cantina da siccà 12 o 24 mesi.





For di sti prudutti stracunnisciuti, asistini altri cusì boni : a vuletta (buletta/guletta o bulagna), a panzetta, i sangui, u lonzu tupinu (o pescia)...



## IDINTIFICÀ A QUALITÀ

A filiera di pruduzzioni è l'auturità in carica di a so prumuzioni facini tuttu da strappà à u più prestu cirtificazioni. Un'AOC hè stata attinuta pà u prisuttu, a coppa è u lonzu. Sti **prudutti cirtificati** sarani fatti solu cù a carri di i porchi di a razza detta « Nustrale », addivati è scarnazzati in Corsica à l'usu tradiziunali.

# AGHJOVU DI I PARTI DI U PORCU



**Spinu** : Lonzu

**Schirena** : Coppa

**Spadda** : Salamu o prisuttu di davanti

**Daretu** : Lonzu o salamu

**Fiancu** : Lonzitupini o salamu

**L'ammazzami (fecatu, cori, pulmoni)** : Ficateddu


**Coscia** : Prisuttu

**Buccedda** : Vuletta o salamu

**Pettu** : Panzetta o salamu

# SFRUTTERA

## LESSICU



**Addevu stinsivu / élevage extensif :** addevu chì dumanda tarreni assai par pochi animali, à l'incontrariu di l'addevu intinsivu chì dumanda pochi tarreni par assai animali.

**AOC (Appellazioni d'Orighjini Cuntrullata / Appellation d'Origine Contrôlée) :** cirtificazioni data da un paesi à prudutti fatti sicondu normi di fabricazioni pricisi (urighjini luchali di u pruduttu, fabricazioni sicondu reguli difiniti...) / **AOP (Appellazioni d'Orighjini Prutetta / Appellation d'Origine Protégée) :** cirtificazioni data da l'Europa à prudutti fatti sicondu normi di fabricazioni pricisi...

**Cori / Coeur :** abat rouge.

**Coscia - prisuttu / jambon :** fighjulà u disegnu.

**Daretu - lonzu / filet :** fighjulà u disegnu.

**Fecatu / foie :** abat rouge. Ammazzami chì entri com'à parti maiò pà a fabtricazioni di u ficateddu – ficatellu (saucisse de foie).

**Pettu / poitrine :** fighjulà u disegnu.

**Pulmoni / poumons :** abats rouges / ammazzami.

**Prudutti cirtificati / produits certifiés :** pruduttu chì hè avutu una cirtificazioni data da i puteri publichi, com'à un'AOC o un'AOP.

**Salatoghju / saloir :** stuvigliu chì ghjova à a siccata di l'alimenti. Parechji stuvigli pudiani ghjuvà da salatoghju è hè cusì ch'omu trova parechji nomi da difiniscia lu : truvuledda ; bariglioni ; tinazzolu...

**Salamu - salciccia / saucisson**

**Schiiena - coppa - coppata / Échine :** fighjulà u disegnu.

**Spadda / Épaule :** fighjulà u disegnu.

**Spinu - lonzu / Carré :** fighjulà u disegnu.

**Tissutu adiposu - peddi / tissus adipeux :** peau.

**Tissuti muscolari - musculo - carri / Tissus musculaires :** muscle. Carri chì entri in tuttu par fà a robba purcina.

## ROBBA PURCINA FATTA IN CORSICA

Fatta da :

Numaru di porchi  
addivati in Corsica

Pruduzzioni in tonni

Addivatori-trasfurmadori

26 000

1 000 t

Trasfurmadori

0 (carri impurtata)

11 000 t

## DUMANDI

- 1 - Comu hè stata chjamata a razza di u porcu corsu ?
- 2 - Sicondu i studii, d'induva vinarà stu gustu di i bestii addivati à l'usu tradiziunali ?
- 3 - Cita di menti i 5 prudutti prisintati quì.
- 4 - Chì parti entrini pà u più ind'a ricetta di u ficateddu ?
- 5 - Chì rimarchi tù, studiendu u tavuleddu quì sopra ?

Oiu  
d'aliva



41

# Oliu d'aliva

À l'origine, l'alivu hè una pianta, chjamata ugliestru, chì cresce di modu spuntaneu in a machja. L'Omù ha riisciutu à *insità* lu è à cultivà lu. Oghje ghjornu, hè unu di i simboli di u paisaghju maditarraniu.

L'oliu d'aliva corsu hè a particularità d'esse dolce è senza amarezza, cù un muscu di machja è un gustu carattaristicu di noce è di nucelle. Tuttu què vene da u fattu ch'elle sò colte tardil'alive, quand'elle sò belle mature.

Hè adupratu, hè capita, in l'alimintazione, ma dinò dipoi sempre par via di e so prupriità curative è di e so virtù magiche è riligiouse, pà e prighere è par caccià si l'ochju.

## UN POCU DI STORIA

L'archeolughi anu trouu nantu à u situ di Scaffa Piana (Nebbiu) stampe di niciole d'alive in e sporte di u Neolithicu. A fabricazione d'oliu d'aliva ricullaria tandu à u III<sup>zu</sup> millenariu nanzu à Cristu ! Pà u fattu, hè à u XV<sup>mu</sup> è XVII<sup>mu</sup> seculu ch'ella cumencia à sviluppà si l'oleicoltura, cù piantazione nove è l'insità sistematicu di l'ugliestri. A Repubblica di Genuva vole pruduce in Corsica prudutti di spurtazione è l'oliu d'aliva diventa una vera muneta di scambiu. À u XIX<sup>mu</sup> seculu, a cultura di l'alivu hè in pienu sviluppu, rimpattendu cusì a cultura di a biada chì si ne trafala. A Balagna diventa tandu a rigione a più chì pruduce di l'isula.


Ma da l'anni 1920 in quà, par via di a disbitera di e campagne, di i metudi di cultura à l'anticogna è di a concurrenza di l'oliu di granelle (girasole, arachide), l'aliveti vanu tralasciati à pocu à pocu.



## IDINTIFICÀ A QUALITÀ



Da l'anni 1980 in quà, a pruduzione d'oliu campa un rinnovu è s'organizeghja in filiera. A cuuperativa oleicula di Balagna và criata in u 1989, po si forma un sindicatu rigiunale da difende l'oleicoltori corsi (SIDOC). In u 2004, l'oliu d'aliva ottene l'AOC huile d'olive de Corse - oliu di Corsica, po, in u 2007, l'AOP auruepanu chì tistimunieghja di a so qualità è di a so origine. Da avè st'AOP ci vole à rispöttà regule sivere di pruduzione, cum'è a cugliera di frutti belli maturi. Hè ancu privistu, da qui à pocu, di fà u spiccu in l'AOC trà l'alive cascate in terra di modu naturale è quelle cascate di modu miccanicu.



Si conta oghje ghjornu 500 pruduttori d'oliu d'alivu in Corsica, chì 154 sò dichjarati in AOP. Ma iun vole micca di ch'elli sò tutti prufissiunali.

Tutti l'anni, i prufissiunali partecipeghjanu à concorsi rigiunali o naziunali, e midaglie issendu attribuite à i più olli boni di l'annata da aiutà a scelta di i cunsumadori.

Ogni annu, da 20 anni in quà, si face "a fiera di l'alivu" in Montegrossu. Hè culà ch'ella si hè strutturata a filiera. Di listessu modu, si tene di veranu "a festa di l'oliu novu" in Santa Lucia di Tallà. Hè l'uccassione pà i cultivatore di truvà si, di mette in mostra a so pruduzione è di fà la scopre à u publicu.

*Carte di e micrurigione e più chi pruducenu oliu d'aliva.*

# Oliu d'aliva

## VARIITÀ È CUGLIERA

In Corsica, e piantazione d'alivi sò e più impurtante dopu à quelle di i clementini. Occupanu à l'incirca 2 000 ea chì 591 ea sò in AOC.

L'alivi, sinsibuli ch'elli sò à u cotru è à a neve, sò situati u più à spessu à menu di 600 m d'altitutine. Ponu à le volte esse alti 20 metri. Certi anu più di 2 000 anni !

A Balagna è u Taravu sò i dui lochi duv'ella hè a più vechja a cultura di l'alivi. D'altronde, hè in Balagna ch'ella si trova a sola cuiparativa oleicula di Corsica. Pruduce ella sola guasgi a mità di l'oliu in Corsica. Ma sò anzi tuttu i prudutturoni di a Piaghja orientale chì ci portanu a so pruduzione di variità primaticce, favoriti ch'elli sò da tarreni ch'elli ponu annacquà. Asistenu parechje variità d'alive sicondu i rughjoni. E più cultivate sò a ghjermana, un'alive grossa è primaticcia cultivata in i lochi più freti chì dà pocu oliu ; a sabina chì ghjè a più anziana

è chì dà u più oliu, è a zinzala

chì hè colta anzi tuttu  
in u meziornu di  
l'isula (Aiacciu-  
Bunifaziu).

A cuglieria si face,  
sicondu l'altitutine  
è e variità, da u mese  
di nuvembre à u  
mese di ghjugnu,  
quand'elle sò par  
cascà l'alive. Tandu  
sò colte in rete appese o  
poste di manera ch'elli  
ün tocchinu in tarra i  
frutti. Di regula, racolte bone ci  
n'hè ogni dui anni, ciò chì dà una  
pruduzione varievule.



## DA L'ALIVA À L'OLIU

L'oliu d'aliva si pruduce di modu miccanicu, senza ch'ellu ci füssi bisognu di nisuna trasfurmazione chimica. L'oliu si ottene dopu à parechje tappe. Ci hè a prima franta (o fragnera), duv'elle sò turnate in pasta l'alive. Dopu si mena a pasta, ch'elle si forminu gucciulelle d'oliu. A pasta minata riposa dopu, da chì a parte liquida si spicchi da a parte solida furmata da a polpa è da e niciole. Dopu, a parte liquida passa in a centrifuga da spicca l'oliu da l'acqua. À l'ultima, si cola l'oliu da caccià ne i brusgiuli.




Hè a prima franta chì dà l'oliu u più bonu, chjamata vierge o vierge extra sicondu a qualità, è chì và aduprata in cucina. Tempi fà, l'alive si fragnavanu in i fragni, mulini mossi da a forza di l'animali. Oghje ghjornu, i fragni sò miccanizati, è ancu s'ellu ne ferma chì sò mossi da a forza di l'acqua, a maiò parte sò eletrificati è pruvisti di tutte e tecniche muderne. Si parla ancu di fragnu à catena cuntinua.

© SIDOC



Metudu oghjincu da caccià l'oliu d'aliva, un suchju di fruttu schiettu schiettu !

## FRAGNU MOSSU DA L'ANIMALI, DETTU DINÒ FRAGNU À SANGUE



# SFRUTTERA



## LESSICU

AOC (Appellazioni d'Orighjini Cuntrullata / Appellation d'Origine Contrôlée) : Certificazione data à prudutti chì rispondenu à norme di fabricazione pricise assai (origine lucale di u pruduttu, fabricazione sicondu regule difinite...). / AOP (Appellazioni d'Orighjini Prutetta / Appellation d'Origine Protégée) : Certificazione data da l'Europa à prudutti di qualità chì rispondenu à norme pricise assai.

Insità (greffer) : uparazione duv'ellu si ficca a vetta di una pianta ind'un'antra pianta ch'ella pruduci frutti questa.

Oleicoltura (oléiculture) : da u latinu *olea* (alivu, aliva) : tuttu ciò chì tocca à a cultura di l'alivi.

## DUMANDE

- 1 - Chì sò e 3 variità d'alive e più cultivate in Corsica ?
- 2 - Cumu hè ch'ella hà un gustu cusì dolce l'oliu d'aliva corsu ?
- 3 - Cita e duie rigione di Corsica duv'ellu si pruduce u più olio d'aliva. Aiuta ti cù a carta.
- 4 - In chì mesi sò racolte l'alive ?
- 5 - Cumu hè ch'elli mettenu e rete à u pede di l'alivi ?

# Risposti

## RISPOSTE : CLEMENTINA È PUMELU

- 1 - Sò sciuti da una cruciatura trà 2 varietà : aranciu / mandarinu pà a clementina, aranciu / pumelu pà u pumelu.
- 2 - Tutta a piaghja orientale è a Castagniccia / Mare è Monti.
- 3 - Sò tramindui agrumi sciuti da un aranciu. Volenu e listesse condizione climatiche è giografiche.
- 4 - Innò : u pumelu hè più tardivu (u so ciculu dura 12 mesi).
- 5 - À a clementina corsa li anu datu un'IGP.

## RISPOSTI : A CASTAGNA

- 1 - In farina.
- 2 - Iè, 7000 anni fà.
- 3 - Farina, confittura, crema, dolci corsi, biscotti, biera...
- 4 - Da tena u so gustu.
- 5 - a) Si lagna d'essa condannatu senza raghjoni. b) Speca ciò ch'eddu diventa in l'usini.  
c) Ramenta à chi ghjuvava u so legnu : a porta di a casa, u tempiu (sima, burdunali è canteddi), u sulaghju, u cascioni... d) Ramenta ch'eddu era l'arburu pani chì salvava i corsi da a fami nera (Mama Piera).

## RISPOSTE : CASGI

- 1 - u brocciu.
- 2 - u caprunu è u picurinu.
- 3 - Cinque : Calinzana, Niolu, Bastilicaccia, Venacu, Sartinesu.
- 4 - Ci hè di più pecure.
- 5 - u latte di e pecure o capre di a so banda.

# Risposte

## RISPOSTI : VIGNI È VIGNETI

- 1 - À a forma di a pampana è di i caspi.
- 2 - u Niellucciu, u Sciaccareddu (Sciaccarellu), u varmintinu o Malvasiu.
- 3 - Falzu. U culori veni da u metudu di a budditura.
- 4 - U filosserà.
- 5 - I vini di tavulinu (senza labeddi o dinuminazioni ufficiali) sò guasgi spariti à prò di i vini di Paesi. I vini in AOC stani à un niveddu listessu dipoi à so prugressioni tamanta di u 1989.

## RISPOSTE : MELE

- 1 - L'amacu è u nettare di i fiori.
- 2 - 5 variità.
- 3 - Hè par via chì l'ape ùn suchjanu micca e listesse piante sicondu u locu è a stagjone.
- 4 - A muntagnera (da a piaghja à a muntagna), l'impiaghjera (da a muntagna à a piaghja).
- 5 - Hè in Cismonte ch'ella hè a più impurtante a pruduzione di mele.

## RISPOSTI : ROBBA PURCINA

- 1 - Nustrale
- 2 - À l'ultima tappa di u so addevu, sott'à i castagni.
- 3 - Ficateddu, coppa, lonzu, salamu, prisuttu.
- 4 - U fecatu.
- 5 - Parti è più di a robba purcina vinduta in Corsica hè fatta cù a carri d'impurtazioni !

## RISPOSTE : OLIU D'ALIVA

- 1 - Ghjermana, Sabina, Zinzala.
- 2 - L'alive sò colte quand'elle sò belle mature. Si face ch'elle anu persu tutta a so amarezza.
- 3 - A Balagna è u Taravu.
- 4 - Da nuvembre à ghjugnu.
- 5 - Da chì l'alive ùn si guastinu tucchendu in tarra.

# Adrizzi ghjuvativi Indrizzi ghjuvativi

**ODARC** (Office du Développement Agricole et Rural de la Corse) : [www.odarc.fr](http://www.odarc.fr)

**AOC Farine de châtaigne corse/Farina castagnina corsa** : [www.aocfarinedechataignecorse.com](http://www.aocfarinedechataignecorse.com)

**APRODEC** (Association de Promotion et de Défense de la Clémentine Corse) : [clementinedecorse.fr](http://clementinedecorse.fr)

**CIV-Corse** (Conseil Interprofessionnel des Vins de Corse) : [www.vinsdecorse.com](http://www.vinsdecorse.com)

**I.L.O.C.C.** (Interprofession Laitière Ovine et Caprine Corse) : [www.ilocc-corse.com](http://www.ilocc-corse.com)

**Syndicat AOC Miel de Corse** : [www.miel-corse.eu](http://www.miel-corse.eu)

**Syndicat AOC Oliu di Corsica/Huile d'olive de Corse** : [www.olividicorsica.fr](http://www.olividicorsica.fr)

**Syndicat de Défense et de Promotion de l'AOC charcuterie** : 20132 Giovicacce

Tel : 06 03 34 18 26, courriel : [testa.nera@wanadoo.fr](mailto:testa.nera@wanadoo.fr)

**Chambre Régionale d'Agriculture de la Corse** : 15, Av. Jean Zuccarelli - BP 215- 20293 BASTIA cedex

Tél : 04 95 32 84 40 - Télécopie : 04 95 32 84 49 - Courriel : [cda2b@wanadoo.fr](mailto:cda2b@wanadoo.fr)

**Chambre d'Agriculture de Corse-du-Sud** : 19, av. Noël Franchini - BP 913 - 20700 AJACCIO Cedex 9

Téléphone : 04.95.29.26.00 - Télécopie : 04.95.29.26.09 - Courriel : [Direction@corse-du-sud.chambagri.fr](mailto:Direction@corse-du-sud.chambagri.fr)

**Chambre d'Agriculture de Haute-Corse** : 15, Av. Jean Zuccarelli - BP 215 - 20293 BASTIA cedex

Tél : 04.95.32.84.40 - Télécopie : 04.95.32.84.49

**Centre de Formation Professionnelle et de Promotion Agricole de Corse-du-Sud** :

C.F.P.P.A /CFAA - apprentis agricoles de Corse-du-Sud : Route de Levie - 20100 SARTENE.

Téléphone : 04.95.77.06.42 - Télécopie : 04.95.73.46.33 - Courriel : [cfppa.sartene@educagri.fr](mailto:cfppa.sartene@educagri.fr)

**Centre de Formation Professionnelle et de Promotion Agricole de Haute-Corse** :

C.F.P.P.A. et CFAA - apprentis agricoles de Haute-Corse : Aghja Rossa - 20290 BORGO

Téléphone : 04.95.30.02.31 - Télécopie : 04.95.30.02.38 - Courriel : [francois.secondi@educagri.frb](mailto:francois.secondi@educagri.frb)

**Lycée Agricole de Corse-Du-Sud** : Route de Levie 20100 SARTENE

Tél : 04.95.77.09.76 - Télécopie : 04.95.73.46.33 - courriel : [legta.sartene@educagri.fr](mailto:legta.sartene@educagri.fr)

**Lycée Agricole de Haute-Corse** : Lieu-dit « Aghja Rossa » - 20290 BORGO


Tél : 04.95.30.02.30 - Télécopie : 04.95.33.04.91 - Courriel : [lpa.borgo@educagri.fr](mailto:lpa.borgo@educagri.fr)

# I me noti

# E mio note

Imprimé en France  
© CNDP-CRDP de Corse - 2011  
Dépôt légal : décembre 2011  
Éditeur n° 86 620  
Directeur de la publication : Jean-François CUBELLS  
N° ISBN : 978 2 86 620 268 2  
achevé d'imprimer sur les presses de l'imprimerie Corlet,  
ZI.rue Maximilien Vox, 14110 Condé-sur-Noireau





Programme cofinancé par le Fonds Européen  
de Développement Régional



Programma cofinanziato con il Fondo Europeo  
di Sviluppo Regionale

